



**...../2018 DEKRETU-PROIEKTUA, Euskal Autonomia Erkidegoko Fundazioen Erregelamendua onartzen duena.**

Euskal Herriaren Autonomia Estatutuaren 10.13. artikulua arabera, Euskal Autonomia Erkidegoak dauka fundazioen gaineko bakarreko eskumena, fundazioek beren egitekoak nagusiki erkidego honetan betetzen dituzten bitartean.

Euskal Autonomia Erkidegoko Fundazioen Erregelamendua onartzen duen Dekretuak ekainaren 2ko 9/2016 Legea, Euskal Autonomia Erkidegoko Fundazioei buruzkoa, garatea du xede, haren azken xedapenetatik lehenengoan aurreikusitakoa betez. Era berean, garatu, zehaztu eta interpretatu nahi den Lege horrek sartu dituen aldaketa eta berrikuntzen ondorio ere badira Erregelamendua onartzeko beharrezana eta aukera.

Dekretua honako hauek osatzen dute: azalpenen zatia, artikulua bakarra, bi xedapen gehigarri, xedapen iragankor bat, xedapen indargabetzaile bat, bi azken xedapen eta bi eranskin, Euskal Autonomia Erkidegoko Fundazioen Erregelamenduari eta jarduerakodeen zerrendari buruzkoak.

Euskal Autonomia Erkidegoko Fundazioen Erregelamendua 55 artikulua jasotzen ditu, hiri kapitulutan banatuta, xedapen orokorrak, Euskal Autonomia Erkidegoko Fundazioen Babesletza eta Euskal Autonomia Erkidegoko Fundazioen Erregistroa mintzagai, hurrenez hurren.

Euskal Autonomia Erkidegoko Fundazioen Erregistroa eta Babesletza administrazio-organot independenteak dira beren artean, fundazioen gaitan eskumena duen Sailarekiko bakoitzak duen harreman organikoa eta funtzionala gorabehera. Komunikazioaren, elkarkidetzaren eta etengabeko lankidetzaren printzipioak izango dira bi organo horien arteko harremanaren ardatz.

Ekainaren 17ko 12/1994 Lege indargabetua (Euskal Autonomia Erkidegoko Fundazioei buruzkoa) garatzeko aurreko erregelamenduetan (101/2007 Dekretua, ekainaren 19koa, Euskal Autonomia Erkidegoko Fundazioen Erregistroaren Erregelamendua onartzen duena, eta 101/2007 Dekretua, ekainaren 19koa, Euskal Autonomia Erkidegoko Fundazioen Babesletza onartzen duena, hurrenez hurren) bi organo horiek bereizita arautzen ziren arren, egungo Erregelamenduan batera arautu dira, 9/2016 Legearen joerari jarraituz. Joera horren arabera, izan ere, testu bakarrean jaso nahi da Euskal Autonomia Erkidegoko fundazioei buruzko araudi osoa, eta, hala, gaia ulertzeko erraztasunak eta informazioa eman.

I. kapituluak, xedapen orokorren izenburu pean, erregelamendua xedea, aplikazio-eremua, fundazioen gaineko eskumenen banaketa eta fundazio-jardueren sailkapena ezartzen ditu.

Era berean, berriaz adierazten du izapidetze administratiboa bitarteko telematikoen bidez egingo dela, urriaren 1eko 39/2015 Legean (Administrazio Publikoaren Administrazio Prozedura Erkidearenean) jasotako betebeharra kontuan hartuta.

Bestalde, notariotzekiko harremana eta elkarreragingarritasuna aipatzen dira, elkarrekin aritzeko. Hartara, administrazioan izapidetza egin eta komunikatzeko modurik aurreratuenak erabiliko dira, eta, beraz, administrazio-izapidetza erraztu egingo dira eta zerbitzu publikoak arrazionalizatu.



II. eta III. kapituluetan Euskal Autonomia Erkidegoko Fundazioen Babesletzaren eta Erregistroaren zereginak eta oinarrizko printzipioak arautzen dira, bai eta Euskal Autonomia Erkidegoko Fundazioei buruzko ekainaren 2ko 9/2016 Legeak sartzen dituen eskumen berriak garatzen ere.

II. kapituluak, Euskal Autonomia Erkidegoko Fundazioen Babesletzari buruzkoak, horien egiturari eta funtzionamenduari buruzko bi atal jasotzen ditu. Euskal Autonomia Erkidegoko Fundazioen Babesletzaren Aholku Batzordea ere arautzen da, babesletzaren kontsulta-organoa baita. Horren harira, aipatzekoa da Batzordearen txostenak nahitaezkoak direla, baina, ez, ordea, lotesleak, bai fundazioen osaera inskribatzeko espedienteak izapidetzeari, kontuan hartuta beren zilegitasuna eta xedeen interes orokorra nahiz horien bideragarritasun ekonomikoa, bai fundazioen gaineko xedapen orokorren proiektuetan parte hartzean. Kapitulu honetan sartutako berrikuntzen artean nabarmentzekoak dira:

Urteko prebentzio-ikuskapenak arautzen dira, horixe izanik Euskal Autonomia Erkidegoko Fundazioen Legeak sartutako berrikuntzetako bat, etorkizunean garatu ahalko dena. Ikuskapen horien xedea da Babesletzak fundazioen araudia eta fundatzaileen borondatea betetzen ote diren egiazta dezala. Horretarako, fundazioak ekonomikoki bideragarriak diren eta estatutuetan aurreikusitako interes orokorreko xedek betetzen ote diren ziurtatuko du.

Kontuak aurkezteko izapideak, bestalde, garatu eta arautu egin dira. Hala, Euskal Autonomia Erkidegoko Administrazioaren egoitza elektronikoa jasotako inprimakien bidez beteko dira, eta zerbitzu publiko garden, erraz eta teknologikoki aurreratua eratuko da, erregistroko informazioa modu erraz, fidagarri eta kalitatezkoan eskuratzeko, segurtasun juridikoa bermatuta.

Fundazioen jarduera ekonomikoa berebiziko garrantzia dauka, eta, horrekin lotuta, hainbat alderdi garatzen dira, tartean: xedatzeko eta kargatzeko egintzei buruzko erantzukizunpeko adierazpenaren edukia, hasierako fundazio-horniduraren araudia, fundazioen xedeetara bideratu behar diren diru-sarreraren portzentajearen kalkulua, administrazio-gastuen zehaztapena eta merkataritza-sozietateetako partaidetza.

Kontuak Fundazioen Legean aurreikusitako epean aurkezten ez direnerako Euskal Autonomia Erkidegoko Fundazioen Erregistroa ixteko irizpideak ere ezartzen dira, bai kontuen gordailuaren kontzeptuan, bai itxiera hori altxatzeko baldintzekin lotuta.

III. kapituluak Euskal Autonomia Erkidegoko Fundazioen Erregistroa arautzen du. Lau atalek osatzen dute kapituluak. Lehen atalean xedapen orokorrak azaltzen dira, erregistroaren xedea eta eginkizunak zehazteko. Bigarren atalak nahitaez inskribatu behar diren egintzak zehazten ditu, erregistro-idazpenen eta -inskripzioen izaera ezarri ahala. Hirugarren atalak inskribatu beharreko egintza bakoitzaren prozedura azaltzen du. Azkenik, laugarren atalak Erregistroaren beste eginkizun batzuk garatzen ditu. Hona hemen kapitulu honetan nabarmendu daitezkeen berrikuntzak:

Fundazioa eratzeko eskritura publikoan nahitaez jaso behar den izendapenaren ziurtagiria jasotzen da. Izen hori urtebeteko epean erreserbatzeko aukera ere badago.

Halaber, fundazioen datu eguneratuen urteko ziurtagiriak gutxienez jaso behar duen edukia garatzen da. Ziurtagiri hori, zehazki, urteko kontuekin batera aurkeztu behar da,



eta, bertan, ekitaldi ekonomiko bakoitzaren amaieran dauden erregistro-datu nagusiak jasotzeaz gain, Euskal Autonomia Erkidegoko Fundazioen Erregistroak segidako traktua betetzen dela egiazta dezan, Erregelamendu honetan aipatutako datuak ere jaso behar dira, Euskal Autonomia Erkidegoko Fundazioen Babesletzak balora dezan diru-sarrerak fundazioaren xedeetara bideratzeko betebeharra betetzen dela eta administrazio-gastuen muga zaintzen dela, bai eta erabilitako baliabideen, egindako jardueren eta lortutako xedeen artean proportzionaltasun egokia dagoela ere.

Erregelamenduan zehar beste alderdi batzuk ere garatzen dira: erregistroko publizitatea telematikoki izapidetzea, liburu eta kontsultak legeztatzea, autokontratazioa egitea, eta patronatuaren edo aholku-batzordearen bilerak aurrez aurre bertaratu gabe egiteko aukera. Bestalde, fundazioak zatitu edo eraldatzeko espedienteen prozedura arautzen da, Euskal Autonomia Erkidegoko Fundazioen Legean aurreikusia.

Ondorioz, eta Gobernantza Publiko eta Autogobernuko sailburuaren proposamenez, Euskadiko Aholku Batzorde Juridikoaren 2018ko .....aren .....(e)ko irizpena kontuan hartuta eta Gobernu Kontseiluak 2018ko .....aren .....(e)(a)n eginiko bilkuran aztertu eta onartu ondoren, honako hau

#### **XEDATZEN DUT:**

**Artikulu bakarra.-** Euskal Autonomia Erkidegoko Fundazioen Erregelamendua onartzea. Dekretu honen eranskinean dator erregelamendu hori.

#### **Lehen xedapen gehigarria.- Ordezko aplikazioa.**

Erregelamendu honetan aurreikusten ez diren kasuetan, administrazio publikoen administrazio-prozedura erkidea arautzen duten arauak aplikatuko dira.

#### **Bigarren xedapen gehigarria.- Jardueren kodeak.**

Fundazioek garatu ohi dituzten jardueren zerrenda erantsi da, beren kodearekin batera, Erregelamendu honen 4. artikuluan aurreikusitako erregistroan sailkatu dadin, kode eta guzti. Honako inskripzio-eskaera hauei soilik aplikatu ahal izango zaie: Euskal Autonomia Erkidegoko fundazioen eraketa, estatutuetan jasotako helburuen aldaketa, eraldaketa, bat-egitea, zatiketa eta ordezkartza.

#### **Xedapen iragankorra.- Inskripzio-prozesuan dauden fundazioak, eta inskribatutako fundazioen egintzak, inskribatzeko daudenak.**

Euskal Autonomia Erkidegoko Fundazioen Erregistroan fundazioen eraketa inskribatzeko eskaerak eta dagoeneko inskribatutako fundazioen egintzak inskribatzekoak, erregelamendu hau indarrean jarri aurretik aurkeztu baldin badira, aurkezteko unean indarrean dagoen araudiari jarraikiz izapidetu eta ebatziko dira.

#### **Xedapen indargabetzailea.**

Dekretu hau indarrean jartzean, indargabetu egingo dira 101/2007 Dekretua, ekainaren 19koa, Euskal Autonomia Erkidegoko Fundazioen Erregistroaren Erregelamendua



onartzen duena, eta 101/2007 Dekretua, ekainaren 19koa, Euskal Autonomia Erkidegoko Fundazioen Babesletza onartzen duena, bai eta, oro har, dekretu honetan xedatutakoaren aurka doazen maila bereko edo apalagoko xedapen guztiak ere.

### **Azken xedapenetatik lehenengoa.- Erregelamendua garatzea.**

Ahalmena ematen zaio fundazioen arloko eskumena duen sailburuari Euskal Autonomia Erkidegoko Fundazioen Erregelamenduan aurreikusitakoa garatu eta egikaritzeko behar diren xedapenak eman ditzan.

### **Azken xedapenetatik bigarrena.- Indarrean jartzea.**

Euskal Herriko Agintaritzaren Aldizkarian argitaratu eta hurrengo egunean jarriko da indarrean dekretu hau.

## **ERANSKINA**

### **EUSKAL AUTONOMIA ERKIDEGOKO FUNDAZIOEN ERREGELAMENDUA**

#### **I. KAPITULUA**

#### **XEDAPEN OROKORRAK**

##### **1. artikulua.- Xedea eta aplikazio-eremua.**

1.- Erregelamendu honen xedea da Euskal Autonomia Erkidegoko Fundazioei buruzko ekainaren 2ko 9/2016 Legea garatzea, Euskal Autonomia Erkidegoko Fundazioen Babeslaritzari eta Erregistroari dagokienez.

2.- Euskal Autonomia Erkidegoko Fundazioen Erregistroan inskribatuta dauden fundazio eta ordezkariak aplikatuko zaie Erregelamendua, bai eta hartan inskribatzeko izapideak egiten ari direnei ere, betiere Euskal Autonomia Erkidegoko Fundazioei buruzko Legean ezarritako eran.

##### **2. artikulua.- Euskal Autonomia Erkidegoko Fundazioen Babeslaritza eta Erregistroa. Izaera.**

1.- Euskal Autonomia Erkidegoko Administrazio Orokorrak –fundazioei buruzko araudia betearazteko– Fundazioen Erregistroaren eta Babeslaritzaren bidez jarduten du. Alde horretatik, zerbitzu publikoa ematen diete Babeslaritzak eta Erregistroak bai herritarrei, bai haietara jo behar edo nahi duten erakundeei.

2.- Bata bestetik administrazio-organo independenteak dira Euskal Autonomia Erkidegoko Fundazioen Babeslaritza eta Erregistroa. Haien artean koordinatuta betetzen dituzte fundazioei aholku emateko eta haiek kontrolatzeko eginkizunak, Erregistroan jaso beharreko egintza eta negozio juridikoak inskribatzekoak eta Euskal Autonomia Erkidegoko Fundazioen Legean bildutako gainerako eginkizunak.



### **3. artikulua.- Fundazioen arloko eskumenak.**

1.- Honako eginkizun hauek dagozkio fundazioen arloko eskumenak dituen saileko sailburuari, Euskal Autonomia Erkidegoko Fundazioen Babeslaritzari eta Erregistroari dagokienez:

- a) Agindu bidez ebaztea Euskal Autonomia Erkidegoko Fundazioen Erregistroan inskripzioak egiteko espedienteak eta fundazioak eratzeko, estatutuak aldatzeko, bat egiteko, zatikatzeko, aldatzeko, azkentzeko eta likidatzeko espedienteak.
- b) Jaurlaritzaren Kontseiluari proposatzea antolamendu juridikoan ezarritakoaren arabera bidezko diren egintza judizialez baliatzea.
- c) Fundazioen arloko xedapen orokorretarako proposamenak aurkeztea Jaurlaritzaren Kontseiluari.

2.- Fundazioen arloko eskumena duen zuzendaritzaren titularrari dagozkio fundazioen Erregistroaren eta Babeslaritzaren gainerako eginkizunak.

### **4. artikulua.- Fundazioen jardueren sailkapena.**

1.- Fundazioek interes orokorreko helburuak bete behar dituzte, eta helburu horiek lortzea sustatzen duten jarduerak garatu behar dituzte.

2.- Fundazioen helburu eta jarduerak kodifikatuta jaso daitezenean, fundazioaren jarduera nagusiarekin bat datorren kodea adieraziko dute interesdunek inskripzio-eskaeretan, eta, horretarako, erregelamendu honen eranskinean zehazten diren kodeak erabiliko dituzte. Kode egokirik identifikatzen ez badute, «Bestelakoak» aukeratu ahal izango dute.

3.- Erregistroak dagokion erregistro-orrian idatziko du fundazioak hautatutako kodea.

### **5. artikulua.- Baliabide telematikoen bidezko kudeaketa administratiboa.**

1.- Euskal Autonomia Erkidegoko Fundazioen Erregistroak informazioaren eta komunikazioaren teknologietan oinarritutako sistemak erabiliko ditu prozedurak kudeatzeko, erregistro-idazpenak egin eta kudeatzeko, informazioa biltzeko, bai eta herritarrekin eta fundazioekin berekin harremanak izateko ere, herritar eta administrazio publikoen arteko harremanak arautzen dituen administrazio-prozedura erkidearen araudian xedatutakoarekin bat etorritik.

2.- Sistema horiek elkarreragingarritasuna ahalbidetu behar dute Euskal Autonomia Erkidegoko Fundazioen Erregistroaren eta administrazio publiko eta organo judizialen artean, administrazio eta organo horiek beren eskumenak baliatzen dihardutela eta beren erantzukizunpean, Erregistroko datuak eskuratzeari dagokionez. Betiere, bereziki babestutako datuei buruzko salbuespenak errespetatu beharko dituzte. Datuak eskuratzeko, prozedura elektronikoak erabiliko dira, eta Elkarreragingarritasun eta Segurtasun Eskema Nazionaletan ezarritako baldintzak eta preskripzio teknikoak bete beharko dira.

### **6. artikulua.- Notariotzekiko harremanak.**



1.- Notariotzek, beren eskumenak baliatuz, eta erregelamendu honekin bat etorriz, Euskal Autonomia Erkidegoko Fundazioen Erregistroan inskribatu behar diren dokumentuak baimentzen badituzte, Babeslaritzari jakinaraziko diote dokumentuok egiletsi dituztela Erregistroan inskribatu daitezen, eta, horretarako, Erregistroen eta Notariotzaren Zuzendaritza Nagusiaren plataforma telematikoaren eta Euskal Autonomia Erkidegoko Administrazio Orokorraren plataforma teknologikoaren arteko elkarreragingarritasun-prozedurak erabiliko dituzte.

2.- Notaritzak, egintza bat baimentzea eskatu duen fundazio edo pertsonaren izenean, egintza hori izapidetzen badu Euskal Autonomia Erkidegoko Fundazioen Erregistroaren edo Babeslaritzaren aurrean, baliabide telematikoaren bidez egin beharko du nahitaez, aurreko apartatuan adierazitako plataformak erabiliz.

## II. KAPITULUA

### EUSKAL AUTONOMIA ERKIDEGOKO FUNDAZIOEN BABESLARITZA

#### 1. ATALA

### EUSKAL AUTONOMIA ERKIDEGOKO FUNDAZIOEN BABESLARITZAREN EGITURA

#### **7. artikulua.- Euskal Autonomia Erkidegoko Fundazioen Babeslaritza.**

Fundazioak kontrolatzeko eta haiei aholku emateko organoa da Euskal Autonomia Erkidegoko Fundazioen Babeslaritza, eta fundazioen arloko eskumena duen sailaren mende jarduten du.

#### **8. artikulua.- Euskal Autonomia Erkidegoko Fundazioen Babeslaritzaren Aholku Batzordea.**

1.- Kontsulta-organoa da Aholku Batzordea, eta Euskal Autonomia Erkidegoko Fundazioen Babeslaritzari laguntzen dio. Haren txostenak nahitaezkoak izango dira, baina ez lotesleak. Fundazioen arloko eskumenak esleituak dituen sailari atxikita egongo da.

2.- Aholku Batzordearen araubide juridikoak, erregelamendu honetan aurreikusita ez dagoen guztian, administrazio publikoen kide anitzeko organoen erregulazioa bete beharko du, dagokion araudian jasota dagoena.

#### **9. artikulua.- Euskal Autonomia Erkidegoko Fundazioen Babeslaritzaren Aholku Batzordearen egitura eta funtzionamendua.**

1.- Honako hauek osatuko dute Euskal Autonomia Erkidegoko Fundazioen Babeslaritzaren Aholku Batzordea: lehendakaria, lehendakariordea, bokalak –Eusko Jaurlaritzaren sail bakoitzaren ordezkarietan– eta idazkaria.

2.-. Fundazioen arloko eskumenak dituen zuzendaritzako titularra izango da lehendakaria, eta batzordearen zuzendaritza- eta ordezkarietan lan egiteko, bai eta gai-zerrenda ezarri, bilkuren deialdia egin eta haietan buru izan eta erabakiak



betearazi ere. Kalitateko botoa izango du, berdinketa gertatuz gero bozketak erabakitzeke.

3.- Lehendakariordea, berriz, fundazioen arloko eskumenak dituen zuzendaritzako aholkularitza juridikoaren arduraduna izango da. Lehendakaria ordeztuko du, hura ez dagoenean edo absente edo gaixorik dagoenean, eta hark eskuordetzen dizkion eginkizunak beteko ditu.

4.- EAeko Administrazio Orokorra osatzen duten sail bakoitzeko bokal bat egongo da, eta, horretarako, titular bat eta ordezeko bat izendatuko dira.

5.- Idazkari-lanetan, fundazioen arloko zuzendaritzako teknikari bat arituko da, eta hitza izango du baina botorik ez. Bilkuren akta eta deialdiak egingo ditu, bai eta dokumentazioa kudeatu eta batzordearen funtzionamendu egokirako beharrezkoa den guztia artxibatu ere.

6.- Lehendakariak hala erabakiz gero, dagokion gaian espezialista edo aditu direnek parte hartu ahal izango dute bilkuretan, bai eta fundazioen kontuen auditoretza- eta kontrol-lanak egiten dituzten pertsonak ere, eta hitza izango dute, baina botorik ez.

7.- Aholku Batzordea balio osoz eratzeko, han nahitaez izan beharko dute lehendakariak, lehendakariordeak eta idazkariak. Organoa osatzeko, gainera, bokalak bertaratu dira, Eusko Jaurlaritzan fundazioen arloko eskumenak esleituak dituzten sailen ordezkarietan, Aholku Batzordeak zer sailtako espedienteak aztertu behar dituen, sail horietako bokalak, hain zuzen ere.

8.- Batzordeak bere jardueri buruzko memoria bat prestatu beharko du urtero, eta, han, zehaztuko du zenbat fundazio eratu diren, zer izaera eta helburu mota duten, bai eta batzordearen beraren funtzionamenduari buruzko informazio garrantzizkoa ere. Memoria hori argitara eman beharko da Euskal Autonomia Erkidegoko Administrazio Orokorren web-orri korporatiboan.

9.- Fundazioen arloko eskumenak dituen zuzendaritzako titularrak, Babeslaritzaren eginkizunetan diharduela, erabaki dezake Aholku Batzordearen bilkurara deitzea, eta baimena eman dezake batzordekideren batek modu ez-presentzialean parte har dezan, egoerak edo norbaitek hala eskatzen duenean.

10.- Lehendakariak egingo du bilkuretarako deialdia, hamar egun baliodun lehenago, eskuarki, edo 48 ordu lehenago, urgentzia-arrazoiak tarteko direnean. Deialdian, hauek jasoko dira: gai-zerrenda, bilkuraren eguna eta tokia eta, hala badagokio, gaiak aztertzeko beharrezkoa den dokumentazioa.

11.- Bertaratutakoen botoen gehiengo soilez hartuko dira erabakiak. Kide guztiek eska dezakete aktan berriaz jaso dadin gehiengoak hartutako erabakiaren aurka agertu direla. Gainera, boto partikularra aurkez dezakete gehiengoaren erabakien aurka, edo boto horren berri jakinarazi, bilkura amaitu aurretik. Hala eginez gero, idatziz helarazi beharko diote botoa lehendakariari, bi eguneko epean. Boto partikular horrekin bat egin dezakete batzordeko gainerako kideek ere, edo beren botoa idatzi, betiere bilkura amaitu aurretik eskubide hori baliatu baldin badute.

## 2. ATALA



## **EUSKAL AUTONOMIA ERKIDEGOKO FUNDAZIOEN BABESLARITZAREN FUNTZIONAMENDUA**

### **10. artikulua.- Euskal Autonomia Erkidegoko Fundazioen Babeslaritzaren funtzionamendua.**

1.- Honako eginkizun hauek izango ditu Euskal Autonomia Erkidegoko Fundazioen Babeslaritzak:

a) Patronatuarekin lotutako eginkizunak: nagusiki, patronatukideak ordeztu eta izendatzea, eta autokontratazioaren ondoriozko egoerak.

b) Fundazioen funtzionamenduarekin lotutako eginkizunak: fundazioak beren helburuetara egokituta aritzen direla egiaztatzen da prebentzio-ikuskapenen bidez, jarduerak egiaztatzeko prozeduren bidez eta entitate horiek behin-behinean kudeatzeko prozeduren bidez.

c) Fundazioen jarduera ekonomikoekin lotutako eginkizunak, jarduera hauek barne direla: fundazioek egindako xedatze- edo zergapetze-egintzak eta merkataritza-sozietateetan parte hartzea. Bere gain hartuko ditu, halaber, kontuen ikuskatsetik ondorioztatzen diren eginkizunak.

2.- Fundazioen jarduerak Euskal Autonomia Erkidegoko Fundazioen Babeslaritzarekiko bete beharko duten araubide juridikoa, oro har, erantzukizunpeko adierazpena edo komunikazioa da, salbu eta autokontratazio-kasuak baldin badaude fundazioaren eta haren gobernu-organoko kide eta haien ordezkarien artean; halakoetan, betiere, alde zuzenetik baimena eman beharko du Euskal Autonomia Erkidegoko Fundazioen Babeslaritzak.

### **11. artikulua.- Fundazioen patronatuarekin lotutako eginkizunak.**

1.- Patronatuko kideak gutxiago baldin badira legedian eta estatutuetan ezarritako gutxieneko kopurua baino, Euskal Autonomia Erkidegoko Fundazioen Babeslaritzak kide gehiago izendatzeko eskatuko dio patronatuari, eta, horretarako, bi hilabeteko epea emango dio. Epe hori luzatu ahal izango da, fundazioaren patronatuak eskaera arrazoitua eginez gero.

2.- Emandako epea izendapenik egin gabe bukatzen bada, Babeslaritzak izendatuko ditu egoki irizitako pertsonak, fundazioen arloarekin duten harremanagatik edo beharrezkoa den ezagutza tekniko edo ekonomikoa dutelako. Izendatuek espresuki onartu edo uko egin beharko diote izendapenari. Behin-behinekoa izango da izendapen hori, patronatuaren funtzionamendua normalizatu artekoa.

3.- Patronatuak berrosatzeko modurik ez badu, horren berri emango dio agintaritza judizialari, beharrezkoak diren neurriak har ditzan.

### **12. artikulua.- Fundazioen patronatuaren osaera eta funtzionamendua.**

1.- Babeslaritzak zaindu egingo du fundazioen araudia eta estatutuak betetzen direla honako alderdi hauei dagokienez: fundazioen patronatuaren osaera, patronatukideak





izendatu eta ordezteko arauak, patronatukideek kargua uzteko arrazoiak, haien eginkizunak eta eztabaidatzeko eta erabakiak hartzeko modua.

2.- Fundazioaren estatutuetan, berariaz arautu beharko dira aurreko paragrafoan adierazitako alderdiak, edo, bestela, artikulua honetan ezarritakoa aplikatu, non ezartzen baitira fundazioen patronatuaren osaera eta funtzionamendurako ordezeko arau hauek:

a) Lehendakari bat egongo da, fundazioa ordezkatzeko duena, salbu eta patronatuak berariaz beste kide bati esleitu badio eginkizun hori. Lehendakariak, halaber, patronatuaren bilkuretara deituko du eta haietan buru izango da, eztabaidak bideratuko ditu eta hartutako erabakiak betearaziko.

b) Idazkari bat izendatuko du patronatuak, kideen artean, hitza eta botoa izango duena, edo kanpoko bat, baina, hala eginez gero, ez du botorik izango. Idazkariak bilkuren aktak egin, fundazioaren agiriak zaindu eta egiaztagiriak emango ditu, lehendakariaren oniritziarekin.

c) Lehendakariaren kargua bete barik edo bera ez dagoela edo gaixorik dagoela, lehendakariordea arituko da haren ordezkari eta, horren ezean, patronatukide zaharrena. Idazkariaren ordezkari, aldiz, kide gazteena arituko da.

d) Lehen deialdian egindako bilkura baliozkoa izateko, kideen erdiak gehi bat batzen direnean. Bigarren deialdian, berriz, ez da baldintza hori bete beharko. Bi deialdietan, patronatuko hiru kide bertaratu beharko dira gutxienez, eta han beharko dira, orobat, lehendakaria eta idazkaria, edo eurek berariaz izendatutako ordezkariak.

e) Botoen gehiengoz hartuko dira erabakiak, eta berdinketa gertatuz gero, lehendakariaren botoak ebatziko du. Nolanahi ere, fundazioaren estatutuak aldatzeko, fundazioek bat egiteko, zatitzeko, aldatzeko edo azkentzeko, ezinbestekoa izango da bertaratutakoen bi herenen aldeko botoa.

f) Patronatuko kideek ordezkatzeko baimena eman ahal izango diote gainerako beste edozein kideri bilkuretara bertaratu daitezkeen, lehendakariari lau egun lehenago zuzendutako jakinarazpen-idazki baten bidez. Bilkura bakoitzerako egin beharko da berariaz. Patronatuko berezko kide direnak, halaber, behin betiko ordeztuak izan daitezke, beren kargu publiko edo pribatua dela eta.

g) Patronatuak hartutako erabakiak akta-liburuan transkribatuko dira. Lehendakariak eta idazkariak izenpetuko dute bilkura bakoitzeko akta, eta, han, honako hauek jasoko dira: hartutako erabaki guztiak, bilkurara dei egindakoak eta bertaratutakoak, bozketen emaitzak, boto partikularrak eta parte-hartzaileen adierazpen esanguratsuak.

### **13. artikulua.- Patronatukideak autokontratatzeko baimena ematea.**

1.- Patronatuko kideek eta haien ordezkariak ezin dute kontratatu fundazioarekin, ez beren izenean, ez hirugarrenen izenean, baina, salbuespenez, autokontratazio hori eska diezaioke Euskal Autonomia Erkidegoko Fundazioen Babeslaritzari, alde aurretik baimendu dezan.

2.- Euskal Autonomia Erkidegoko Fundazioen Babeslaritzaren aurrean aurkeztu



beharko da baimen-eskaera, eta, harekin batera, beharrezkoa den dokumentazioa, egin beharreko kontratazioan interes-gatazkarik ez dagoela behar bezala justifikatzeko. Interes-gatazka egongo da, baldin eta patronatuko kide baten edo haren ordezkariaren laneko interesak, interes pertsonalak, profesionalak, familiakoak edo negoziokoak kolokan jar badezakete haren inpartzialtasuna eta objektibotasuna eginkizunak betetzerakoan, edo fundazioari kalte egin badieziaiokete.

3.- Halaber, fundazioarekin kontratu bidez lotura duen pertsona fisiko edo juridiko batek fundazioaren patronatuko kide izan nahi badu, autokontrataziorako baimena eskatu eta lortu beharko du izendapena jaso baino lehen. Bestela, ezin izango dute patronatuko kide izendatu.

4.- Autokontrataziorako baimen-eskaerarekin batera, kontratazioa gauzatzeko borondatea adierazten duen ziurtagiria aurkeztu beharko da, bai eta beharrezkoa den dokumentazioa ere, eta, han, honako hauek jasoko dira, gutxienez:

- a) Patronatuko zer kide kontratatu nahi den, eta zer kontratu mota egin nahi den, bai eta haren ezaugarriak eta datuak ere.
- b) Interes-gatazkarik ez dagoela patronatuko kidearen edo haren ordezkariaren eta fundazioaren artean.
- c) Arriskurik ez dagoela fundazioa ekonomikoki bideragarria izan dadin.
- d) Kontratazioak lagundu egingo duela fundazioaren helburuak hobeto lortzen.
- e) Kontratazioaren helburu diren zerbitzuengatik ordaina emango dela, merkatuak ezarritako baldintzetan egiten dela kontratazioa, eta proportzionala eta orekatua dela, kontuan hartuta zein diren egindako jarduerak eta lortu nahi diren helburuak.

5.- Fundazioen Babeslaritzak ebatziko du autokontratazio-espeditentea, ebazpen arrazoitu bidez, eta, horretarako, hiru hileko epea izango du. Epe horretan ebazpenik eman ezean, isiltasun positibo bidez ebatzi dela ulertu beharko da.

#### **14. artikulua.- Fundazioen funtzionamenduarekin lotutako eginkizunak.**

1.- Urteko prebentzio-ikuskapenak, jarduerak egiaztatzea eta behin-behineko kudeaketa-prozedura izango dira, funtsean, Euskal Autonomia Erkidegoko Fundazioen Babeslaritzaren eginkizunak, fundazioen funtzionamenduari dagokionez.

2.- Fundazioen funtzionamendu-autonomia errespetatuz burutuko ditu eginkizunok Babeslaritzak, eta helburutzat izango du legedia eta fundatzaileek ezarritako interes orokorreko helburuak betetzen direla bermatzea.

3.- Babeslaritzak, orobat, aholkularitza emango die bai eratuta dauden fundazioei, bai sortze-bidean daudenei.

#### **15. artikulua.- Urteko prebentzio-ikuskapenak eta kautelazko neurriak.**

1.- Urtero egingo ditu Euskal Autonomia Erkidegoko Fundazioen Babeslaritzak ohiko prebentzio-ikuskapenak, fundazioen araudia betetzen dela egiaztatzeko eta fundatzaileen interes orokorreko helburua eta fundazioen bideragarritasun ekonomikoa



babesteko.

2.- Urteko prebentzio-ikuskapenen funtzionamendu-protokoloa argitara emango da.

3.- Ofizioz edo alderdi batek eskatuta has daiteke prebentzio-ikuskapenen prozedura, eta sei hilabeteko epean amaituta egon behar du, prozedura hasteko ebazpenaren egunetik hasita. Salbuespenez, epe hori beste hiru hilabete handitu daiteke ebazpen arrazoitu bidez, kontuan hartuta entitatearen eragiketa-bolumena edo kasuan kasuko ikuskapen-jardueraren konplexutasun handia.

4.- Prebentzio-ikuskapenen jarduera horiek dokumentatu egingo dira akta, txosten edo egiaztagiri bidez, eta agiri horiek publikoak izango dira.

5.- Arrazoizko zantzurik badago adierazten duenik ikuskapenaren helburua eragotzia edo larriki oztopatua izan daitekeela edo interes orokorrari edo fundazioari kalte konponezina eragin dakiokela, Babeslaritzak behin-behineko kautela-neurri hauek hartu ahal izango ditu:

- a) Ikuskapenaren oinarri diren froga-elementuak prezintatu eta konfiskatzea.
- b) Gainerako froga-elementuak eta lehenago aipatutako ekipo informatikoak gordailutzea.

6.- Ikuskatzaileek, fundazioaren egoitzan sartzeko, zorrotz bete beharko dute araudi aplikagarria.

## **16. artikulua.- Jarduerak egiaztatzeko espedientea.**

1.- Euskal Autonomia Erkidegoko Fundazioen Babeslaritzak hasiera emango dio jarduerak egiaztatzeko espedienteari, baldin eta Euskal Autonomia Erkidegoko Fundazioei buruzko Legearen 53.1 artikuluan aurreikusitako egoeraren bat gertatzen bada. Sei hilabete izango du espedientea amaitzeko, hari hasiera eman diola patronatuari jakinarazten dionetik hasita, eta, horretarako, berariazko ebazpena eman beharko du, aipatutako artikulua 2. apartatuan zehazten diren erabakietako bat hartuta. Hiru hilabete handitu ahal izango da epe hori, honako hauek geratzen direnean:

- a) Egiaztapena egitea bereziki korapilatsua gertatzen denean, fundazioaren ondareagatik, kudeatutako jardueren kopuruagatik, fundazioak enpresa-jarduerak egiteagatik edo merkataritza-sozietateetan parte hartzeagatik.
- b) Jarduerak egiaztatu ahala jardueren egiaztapena eragin dutenak ez diren beste egitate batzuk atzematen direnean.

2.- Jarduerak egiaztatzeko, honako bide hauek erabiliko dira, besteak beste:

- a) Patronatuko kideak agertzea Babeslaritzaren aurrean.
- b) Agiriak, liburuak, kontabilitatea, fitxategiak, fakturak eta fundazioaren jarduerak egiaztatzeko beharrezkoa den beste edozein agiri aurkeztea.
- c) Babeslaritza bertaratzea fundazioaren egoitzara edo lokaletara eta jarduerak



egiten dituen beste edozein lekutara.

d) Babeslaritzak agindutako auditoretza-txostena aurkeztea, fundazioaren ondarea eta finantza-egoera argi eta garbi zehazteko.

3.- Jarduerak egiaztatzeko jarduketak dokumentatu egingo dira akta, txosten edo egiaztagiriri bidez, eta agiri horiek publikoak izango dira.

#### **17. artikulua.- Fundazioen behin-behineko kudeaketa.**

1.- Euskal Autonomia Erkidegoko Fundazioen Babeslaritzak, behin-behinean, bere gain hartuko du fundazio baten kudeaketa, aurretik baimen judiziala eskuratuta, eta, gehienez, bi urteko epean, betiere kudeaketa ekonomikoan fundazioaren biziraupena arriskuan jartzeko moduko irregulartasun larriak atzemanaz gero, edo desbideratze larria fundazioaren helburuen eta egindako jardueraren artean. Horretarako, Fundazioei buruzko Legearen 54. artikuluan ezarritako prozedurari jarraituko dio.

2.- Fundazioak patronaturik ez badu, edo patronatua epailearen ebazpenez bere funtzioetan aritzeko ezgaituta baldin badago, Babeslaritzak bere gain hartuko du, behin-behinean, fundazioaren jarduera kudeatzeko ardura, fundazioa gobernu-organoz hornitzeko, batez ere. Fundazioak patronaturik ez duela ulertuko da, baldin eta hura kiderik gabe geratu bada, edo bete gabeko karguen hutsuneek erabateko eragina badaukate eguneroko jardunean.

3.- Babeslaritzak ezin badu osatu fundazioaren estatutuetan ezarritakoaren araberrako patronatu bat, agintaritzak judizialari eskatuko dio fundazioa azkentzeko eta likidatzeko prozedura abiarazteko.

#### **18. artikulua.- Fundazioen jarduera ekonomikoekin lotutako eginkizunak.**

1.- Fundazioen jarduera ekonomikoak kontrolatuko ditu Euskal Autonomia Erkidegoko Fundazioen Babeslaritzak, xedatze- edo zergapetze egintzen eta merkataritza-sozietateetan parte hartzeko egintzen jarraipenaren bidez eta gordailutzeko aurkeztutako urteko kontuen bidez.

2.- Babeslaritzak, halaber, egiaztatuko du fundazioak diru-sarreraren portzentaje egokia bideratzen duela estatuetan finkatutako interes-orokorreko helburuetara eta administrazio-gastuetara, Fundazioei buruzko Legean eta irabazi asmorik gabeko kontabilitate-arauetan ezarritakoari jarraituz.

#### **19. artikulua.- Xedatze- eta zergapetze-egintzak.**

1.- Fundazioaren ondasunak edo eskubideak besterentzerakoan, bai eta fundazioak merkataritza- edo industria-establezimenduetan dituen edozein eratako partaidetzak besterentzerakoan ere, irizpide ekonomiko eta finantzarioak eta merkaturako aplikatuko dira, eta lehia publikoa eta inpartzialtasuna bermatuko dira. Gainera, ziurtatuko da eragiketa ez dela kaltegarria eta ez duela arriskuan jartzen fundazioaren bideragarritasun ekonomikoa.

2.- Eragiketarako irizpide ekonomiko eta finantzarioei eta merkaturakoei jarraitzen diela eta fundazioari ez diola kalterik egingo arrazoitzeko, erantzunkizunpeko adierazpenean memoria bat jasoko da, eta, han, besterendutako ondasun eta eskubideen balorazio



bat eta adierazitako baldintzak betetzeari buruzko egiaztagiri bat bilduko dira.

3.- Zergapetze-egintzak –hala nola, mailegu, usufuktu, azalera-eskubide edo bestelako zergapetzeak– jakinaraztean, informazioa eman beharko da ondasun eta eskubideen jatorriari, destinoari, zenbatekoari eta balorazioari buruz, bai eta zergapetzearen baldintza esanguratsuei buruz ere.

4.- Ondare-zuzkidura osatzen duten ondasun edo eskubideak eta fundazioaren helburuak lortzearekin zuzenean lotuta daudenak besterentzeko edo zergapetzeko, fundatzaileek edo ekarpenak egin dituztenek jarritako baldintzak bete beharko dira. Fundazioaren helburuak lortzearekin zuzenean lotuta dauden ondasun eta eskubideak besterenduta edo zergapetuta lortutako produktua berri inbertitu beharko da izaera bereko beste ondasun batzuk eskuratzeko edo hobetzeko.

## **20. artikulua.- Fundazioaren hasierako zuzkidura.**

1.- Fundazioaren hasierako zuzkidura, oro har, ezin izango da diru-sarrerara gisa erabili.

2.- Salbuespenez, eta ekitaldi ekonomiko jakin baterako, fundazioaren hasierako zuzkidura 30.000 eurotik gorakoa bada, eta aurrekontuetan jasotako diru-sarrerak lortu ez badira, edo jarduerak gauzatzeko eta helburuak betetzeko aurreikusi gabeko gastuak egin behar badira, fundazioaren patronatuak erabaki dezake hasierako zuzkiduraren zati bat erabiltzea fundazioaren helburuaren berezko jarduerak egiteko. Zati hori ez da inoiz izango zuzkiduraren erdia baino gehiago.

3.- Fundazioak urtebeteko epea izango du diru-sarrerara gisa erabilitako hasierako zuzkiduraren zatia itzultzeko. Babeslaritzak, salbuespenez, epe hori luzatu ahal izango du, baldin eta fundazioak behar bezala justifikatzen badu eta fundazioaren bideragarritasun ekonomikoa arriskuan jartzen ez bada.

## **21. artikulua.- Urteko kontuak.**

1.- Fundazioen urteko kontuen barruan, balantzea, emaitzen kontua, memoria eta Kontabilitate Plan Orokorak irabazi-asmorik gabeko erakundeentzat ezartzen dituen gainerako agiriak jasoko dira. Bada, kontuok argiro idatziko dira, eta ondarearen, emaitzen, finantza-egoeraren eta azken ekitaldian ondare garbian izandako aldakuntzen irudi zehatza erakutsi behar dute, bai eta garatutako jarduerarena ere, betiere legezko xedapenekin bat etorritik.

2.- Fundazioek, merkataritza-talde bateko erakunde nagusiak badira, Kontabilitate Plan Orokorak irabazi-asmorik gabeko erakundeentzat ezarritakoari jarraituz aurkeztu behar dituzte kontuak, eta, kontuokin batera, urteko kontu bateratuak aurkeztu behar dituzte Euskal Autonomia Erkidegoko Fundazioen Erregistroan, unean-unean indarrean dagoen merkataritza-legeen arabera formulatuta.

3.- Fundazioen kontularitza-jarduerak bat etorri behar du irabazi-asmorik gabeko erakundeei egokitutako Kontabilitate Plan Orokorarekin, bai eta erregelamendu honetan eta Euskal Autonomia Erkidegoko Fundazioei buruzko Legean xedatutakoarekin ere.

4.- Urteko kontuetan jasotako memoriak, Kontabilitate Plan Orokorak irabazi-asmorik gabeko erakundeentzat ezartzen dituen gutxieneko edukiez gainera, informazio hau



bildu behar du: kontuok formulatzeko ardura duten pertsonen iritziz kontuek, oro har, fundazioaren irudi zehatza erakus dezaten eman beharra dagoen informazio oro, eta irabazi-asmorik gabeko erakundeei aplikatu beharreko zerga-arauek eskatzen duten beste edozein informazio.

## **22. artikulua.- Kontuak aurkeztu eta gordailutzea.**

1.- Patronatuak urteko kontuak onartu eta hogeita hamar egun naturaleko epean, Euskal Autonomia Erkidegoko Fundazioen Erregistroan aurkeztu beharko dira.

2.- Euskal Autonomia Erkidegoko Fundazioen Babeslaritzak unean-unean zehaztuko du zer inprimaki erabili beharko duten bere aplikazio-eremuko fundazioek egin behar hori betetzeko. Inprimaki horiek eskuragarri egongo dira Euskal Autonomia Erkidegoko Administrazio Orokorraren egoitza elektronikoa, eta bide telematikoz bete, sinatu eta aurkeztu beharko dira.

3.- Kontuak gordailutzeko aurkeztutako eskaerarekin batera, patronatuak kontuak eta soberakinaren aplikazioa onartzeko hartutako erabakiaren ziurtagiria aurkeztu beharko da, fundazioaren idazkariak eta lehendakariak elektronikoki sinatuta. Ziurtagirian honako hauek adieraziko dira:

a) Kontuak modu laburtuan edo sinplifikatuan formulatu diren, eta horren zergatia.

b) Kontuak bat datozela auditoretzarekin, kontuen auditoretza egin beharra dagoenean; halakoetan, auditoretza-txostena erantsi beharko da, auditore independente batek elektronikoki sinatuta.

c) Argi eta garbi egiaztatuko da modu digitalean aurkeztutako urteko kontuak bat datozela patronatuak onartutakoekin.

4.- Babeslaritzak aztertuko du urteko kontuak formalki egokitzen diren Euskal Autonomia Erkidegoko Fundazioei buruzko Legearen 32.4 artikuluan xedatutakora. Horretaz gainera, egiaztapen materialak egin ahal izango ditu, bere eginkizunak betetzen diharduela, eta, horretarako, lau urteko epea izango du, kontuak aurkezten diren egunetik hasita. Kontuok aztertu ondoren, ebazpena emango du, Euskal Autonomia Erkidegoko Erregistroan haiek gordailutzea baimentzeko, publikoak izan daitezzen. Dokumentazio hau gordailutuko da:

a) Fundazioaren patronatuak onartutako urteko kontuak.

b) Fundazioak kontuen kanpo-auditoretza nahitaez egin behar baldin badu, edo patronatuak borondatez erabaki baldin badu fundazioaren kontuen auditoretza egitea, auditoretza-txostena aurkeztuko da, gordailuan jaso dadin.

c) Kontuak onartzen dituen erabakiaren ziurtagiria, artikuluko honetako hirugarren apartatuan aipatzen dena.

Babeslaritzak hiru hilabeteko epea izango du, kontuak aurkezten direnetik hasita, formalki egokiak direla egiaztatzeko eta haiek gordailutzea baimentzeko. Epe horretan erantzunik ez badago, eskaera isiltasunez baietsi dela ulertuko da.

5.- Babeslaritzak geroago egindako egiaztapen materialen ondorioz beharrezkoa bada



aldaketaren bat egitea gordailututako urteko kontuetan edo jarduketa-planetan, horren berri emango zaio fundazioaren patronatuari, egin beharreko zuzenketak egin ditzan. Agiri horiek ere gordailutu egingo dira, hasiera batean aurkeztutakoekin batera.

### **23. artikulua.- Jarduketa-plana.**

Honako hauek jaso behar dira jarduketa-planean: ekitaldiko gastuen eta diru-sarreraren aurrekontua, eta azalpen-memoria bat, fundazioak aurreikusitako jarduerak jasoko dituen eta bildutako datu ekonomikoak zehaztu eta garatuko dituen. Jarduketa-planak, gainera, honako baldintzak hauek bete behar ditu:

- a) Egitura funtzionala izan behar du, honako hauek zehaztuta: zer helburu lortu nahi diren, zer jarduera egin behar diren horretarako eta zenbat diru erabiliko den, zer finantzabide aurreikusten diren, zenbat lagun arituko den lanean eta zenbat onuradun edo erabiltzaile izango duen aurreikusitako jarduera esanguratsu bakoitzak.
- b) Orekatua izan behar du, hau da, lortutako baliabide ekonomikoen guztizkoak estali behar du erabili behar diren baliabide ekonomikoen zenbatekoa.
- c) Diru-sarreraren multzoan, fundazioak edozein kontzepturengatik jasotzen dituen guztiak sartuko dira, ekitaldian zehar erabiltzeko jasotako dohainak eta diru-laguntzak barne direla, hala gertatuz gero, bai eta eta aurreko ekitaldietako emaitzak ere baldin eta patronatuak fundazioaren helburuetarako erabiltzea erabaki badu.
- d) Gastuen atalari dagokionez, izaera ezberdina dutenak bereiziko dira, eta kontzeptuaren arabera zehaztuko, bereziki administrazio-gastuak.

### **24. artikulua.- Erregistroa ixtea, kontuak epe barruan aurkezteko betebeharra ez betetzeagatik.**

1.- Behin kontuak aurkezteko epea amaituta, Euskal Autonomia Erkidegoko Fundazioen Babeslaritzak Erregistroa ixteko ebazpena emango du Euskal Autonomia Erkidegoko Fundazioen Legean zehaztutako agiriak behar bezala aurkeztu ez dituzten fundazioentzat.

2.- Kontuak epez kanpo aurkeztuz erregistro-orria berriz irekitzea lortzeko, lehenbizi kontuok gordailutu behar dira Erregistroan, betiere Babeslaritzak Euskal Autonomia Erkidegoko Fundazioen Legean aurreikusitako betekizun formalak betetzen direla egiaztatu ondoren.

3.- Kontuak gordailutu ez direla ulertuko da, baldin eta bidali ez badira Euskal Autonomia Erkidegoko Fundazioen Erregistroan gordailutu daitezten, edo, bidali badira ere, inskribatzea eragozten duten akatsak badituzte; halakoetan, zuzenketarik egiten ez bada horretarako epean, artxibatu egingo dira.

### **25. artikulua.- Diru-sarreraren xedea.**

1.- Fundazioek egiten dituzten jardueretatik edo egiten dituzten zerbitzuetatik eskuratzen dituzten diru-sarreraren % 70 erabili beharko dituzte, gutxienez, fundazioaren xedeetarako.

2.- Fundazioak izandako emaitza-kontuaren diru-sarreraren guztizkoa izango da



kalkuluaren oinarria. Oinarri horretatik, diru-sarrerak eskuratzeko beharrezkoak izan diren gastuak baino ez dira kenduko, fundazioaren helburuak lortzeko gastuak izan ezik.

3.- Beharrezko gastutzat hartuko da honako gastu hauetatik diru-sarrerak lortzen laguntzen dutenen zati proportzionala: kanpo-zerbitzuen gastuak, pertsonalekoak, kudeaketakoak, finantzakoak eta tributuenak. Aitzitik, ez dira halakotzat hartuko fundazioaren jarduerak eragindako gastuak.

4.- Gastuak eta diru-sarrerak fundazioaren helburuetara bideratu direla ulertuko da, baldin eta benetan lagundu badute helburu horiek lortzen. Ez dira halakotzat hartuko amortizazioetarako zuzkidurak eta nariatzeak eragindako galerak. Era berean, administrazio-gastuak eta diru-sarrerak lortzeko beharrezkoak direnak ez dira hartuko fundazioaren helburuetara bideratutako gastutzat.

5.- Ekitaldi batean aplikatutako ehuneko hirurogeita hamarrekoaren soberakinak ezingo du konpentsatu hurrengo ekitaldietan aplikatzeko dagoen saldoa.

6.- Artikulu honetan aipatutako kalkuluaren oinarria zehazteko, ez dira inola ere diru-sarreratzat hartuko zuzkidura kontzeptupean egindako ekarpenak –ez eratze-momentuan egindakoak, ez geroagokoak.

## **26. artikulua.- Administrazio-gastuak.**

1.- Honako hauek izango dira administrazio-gastuak:

a) Fundazioaren ondarea osatzen duten ondasun eta eskubideen zaintza, kudeaketa eta defentsak zuzenean sortutako gastuen diru-zenbatekoa.

b) Gobernu-organoko kideek beren funtzioetan aritzeagatik izandako eta behar bezala egiaztatutako gastuen diruaren itzulketa eta, hala badagokio, fundatzaileak kideentzat berariaz ezarritako ordainsariak.

c) Gerentzia edo kudeaketa edo fundazioaren izenean beste jarduera batzuk egiteko ardura ematen zaien eta fundazioaren zerbitzuan diharduten langileen ordainsariak.

2.- Fundazioak izandako emaitzen kontuaren diru-sarreraren guztizkoa izango da kalkuluaren oinarria. Oinarri horretatik, diru-sarrerak eskuratzeko beharrezkoak izan diren gastuak baino ez dira kenduko, fundazioaren helburuak lortzeko gastuak izan ezik.

## **27. artikulua.- Fundazioen jarduera ekonomikoak.**

1.- Fundazioek jarduera propioak edo merkataritza-jarduerak egin ahal izango dituzte.

2.- Jarduera propiotzat ulertzen da fundazioak bere helburuak betetzeko egindakoa, irabazi-asmorik gabe, aintzat hartu gabe prestazioa edo zerbitzua dohainik edo ordain baten truke egiten den.

3.- Fundazioek, beren kontura jardunda, enpresa- eta merkataritza-jarduerak egin ahal izango dituzte, betiere beren kabuz antolatzen badituzte ekoizpen- eta giza-baliabideak, edo bi horietatik bat, ondasun edo zerbitzuen ekoizpenean edo banaketan





esku hartzea helburu, dirua irabazteko asmoz, eta helburua lotuta badago fundazioaren helburuekin, edo helburu horien osagarri edo lagungarri badira, eta, betiere, lehia defendatzeko arauen mende.

4.- Sozietateetan parte hartuz ere egin ahal izango dituzte merkataritza-jarduerak fundazioek, hurrengo artikuluan xedatutakoari jarraituz.

## **28. artikulua.- Fundazioek merkataritza-sozietateetan parte hartzea.**

1.- Edozein merkataritza-sozietateetan parte ahal izango dute fundazioek, betiere bi erakundeen helburuak lotuta badaude, edo fundazioaren helburuen osagarri edo lagungarri badira.

2.- Helburu desberdinak edo fundazioaren helburuen osagarri edo lagungarri ez diren helburuak dituzten merkataritza-sozietateetan ere parte hartu ahal izango dute fundazioek, betiere sozietateak mugatua baldin badauka bere bazkideen erantzukizuna eta sozietate-zorren gainean erantzukizun pertsonalik ez badago.

3.- Merkataritza-sozietate batean duen partaidetza fundazioaren kapitalaren edo boto-eskubideen edo ondare garbiaren % 50etik gorakoa bada, fundazioak berehala eman behar dio inguruabar horren berri Babeslaritzari, 30 eguneko gehieneko epean, eta, jakinarazpenarekin batera, partaidetzen gehiengo eskuratzea justifikatzen duen eskrituraren kopia aurkeztu beharko du, edo boto-eskubideen gehiengo edo ondare garbiaren gehiengo eskuratu izanari buruzko ziurtagiria.

## **29. artikulua.- Fundazioen datu eguneratuei buruzko ziurtagiria.**

1.- Euskal Autonomia Erkidegoko Fundazioen Babeslaritzak balioetsi behar du diru-sarrerak fundazioaren helburuak betetzeko erabili diren, administrazio-gastuaren muga bete den eta proportzionaltasun egokia egon den erabilitako baliabideen, egindako jardueren eta lortutako helburuen artean. Horretarako, honako alderdi hauek jaso behar dituzte fundazioek, urteko kontuekin batera aurkeztu behar dituzten datu eguneratuei buruzko ziurtagirian:

a) Fundazioek Babeslaritzari jakinarazi beharreko xedatze- eta zergapetze-egintzei buruzko informazioa, non zehaztuko baita zein diren egintza horietarako arrazoiak eta beharrak, eta adieraziko baita eragiketak ez diola kalterik eragiten fundazioari eta ez duela arriskuan jartzen haren bideragarritasun ekonomikoa.

b) Erantzukizunpeko adierazpenen gaineko informazioa eta haietan jasotako egintza edo kontratuak burutu izanaren gainekoa.

c) Patronatuko kideen eta haien ordezkarien autokontratazioei buruzko informazioa, honako hauek zehaztuta: zer organok hartu duen erabakia eta zer helburu eta iraupen duten autokontratazioek. Babeslaritzak horretarako emandako baimenari buruzko informazioa ere eman behar da.

d) Babeslaritzak edo dagokion organo eskudunak eskatu duten eta zenbait jarduketa egiteko beharrezko diren baimen edo jakinarazpenei buruzko informazioa. Informazioa emango da, era berean, ebatzi gabe dauden eskaerei buruz.

e) Ekitaldian egindako jardueri buruzko informazioa, honako hauek adierazita: zer



baldintza eta inguruabarretan garatu diren, bakoitzak zer eta zenbat helburu izan duen, jarduerak propioak edo merkataritzakoak diren, zenbat langile aritu diren (soldatapeko, zerbitzu-kontratudun nahiz boluntario), zenbat onuradun edo erabiltzaile izan diren (pertsone fisiko nahiz juridiko) eta zer zerbitzu jaso duten. Sexuaren arabera banakatua eman beharko da aurreko informazioa.

f) Jatorria administrazio publikoetan edo Europar Batasuneko funtsetan duten diru-sarreraren zenbatekoari eta ezaugarriei buruzko informazioa, zer erakunde publikotatik jaso diren adierazita.

g) Fundazioaren helburuak betetzeko gastu eta inbertsioei buruzko informazio zehatza, inbertsio horien finantzabidea adierazita. Halaber, diru-sarreraren ehuneko hirurogeita hamar helburuak betetzeko aplikatu behar dela eta, zehatz-mehatz azaldu behar da zer elementu erabili diren ehuneko horren oinarria kalkulatzeko, eta, halaber, informazio zehatza emango da oinarri horretatik kendutako gastuei buruz eta helburuetan aplikatzeko dauden saldoei buruz. Uneko ekitaldirako eta aurreko hiruretarako eman beharko da informazio hori guztia.

h) Administrazio-gastuei buruzko informazio zehatza, emaitza-kontua kontuaren eta partidaren arabera xehakaturik barne dela, bai eta gastua administrazio-gastuari egozteko erabilitako irizpideei buruzko informazioa ere

i) Inbentarioan honako hauek jasoko dira: ondasun, eskubide, betebeharrak eta bestelako partiden deskribapena; zenbatean eta noiz eskuratu diren; kontabilitate-balioa; balorazioan izandako aldakuntzak; narriatzeagatik eta amortizazioengatik izandako galerak eta bestelako partida konpentsatzaileak, eta besterentze- edo zergapetze-egintzen ondorioz ondarean izandako aldaketa guztiak. Fundazioaren patronatuak –ondasun eta eskubideak fundazioaren helburuekin lotzeari buruzko berariazko borondate-adierazpena egiteko– inbentarioan zehaztuko du zer ondasun dauden zuzenean lotuta fundazioaren helburuak betetzearekin, fundazioaren zuzkiduraren parte diren elementuak bereizita.

j) Kontuen auditoretza egin beharra dagoen ala ez azaltzen duen adierazpena, Fundazioei buruzko Legean aurreikusitako kasuen balorazioa barne dela.

k) Erakundea euskal sektore publikoko erakundetzat hartzen den azaltzen duen adierazpena, Fundazioei buruzko Legean aurreikusitako inguruabarren balorazioa barne dela.

l) Dagokion ekitaldian zenbat enplegatu eta boluntario dagoen, sexuaren arabera banakatuta. Batez besteko enplegatu eta boluntario kopurua zehazteko, kontuan hartuko dira ekitaldian erakundearekin laneko edo boluntariotzako harremanen bat duten edo izan duten pertsona guztiak, eta batez bestekoa kalkulatu da zerbitzuak ematen zenbat denbora igaro duten aintzat hartuta.

m) Fundazioaren organo bakoitzak ekitaldia ixtean dituen kideen zerrenda, sexuaren arabera banakatuta.

2.- Euskal Autonomia Erkidegoko Administrazioaren egoitza elektronikoa eskuragarri egongo da fundazioen datu eguneratuei buruzko ziurtagiriaren ereduak. Urtero bete eta aurkeztu beharko da, kontuekin batera, baina haietatik bereizita.



3.- Bi ekitaldian funts propioen murrizketa larria hautematen bada fundazioaren urteko kontuetan, helburuak lortzea arriskuan jartzen duena, Babeslaritzak patronatuari eskatu ahal izango dio beharrezkoak diren neurriak har ditzan egoera zuzentzeko.

### III. KAPITULUA

#### EUSKAL AUTONOMIA ERKIDEGOKO FUNDAZIOEN ERREGISTROA

##### 1. ATALA

##### ERREGISTROAREN HELBURUA ETA EGINKIZUNAK

#### **30. artikulua.- Euskal Autonomia Erkidegoko Fundazioen Erregistroaren helburua.**

Erregistroaren helburua da Euskal Autonomia Erkidegoko Fundazioei buruzko Legearen aplikazio-eremuan aipatzen diren fundazioak inskribatzea (5. artikuluan jasota dago aplikazio-eremua), bai eta fundazio horien egintza, negozio juridiko eta agiriak inskribatzea ere. Erregistroak, halaber, argitara emango ditu egintza, negozio eta agiri horiek, eta, gainera, dokumentazioa gordailutuko du.

#### **31. artikulua.- Erregistroaren eginkizunak.**

Hauek izango dira Erregistroaren eginkizunak:

- a) Fundazioak eta nahitaez inskribatu beharreko haien egintzak inskribatzea, eta nahitaezko liburuak legeztatzea.
- b) Dokumentazioa gordailutzea.
- c) Idazpenak eta agiriak argitaratzea.
- d) Legez esleituak dituen bestelako eginkizunak.

##### 2. ATALA

##### ERREGISTROKO INSKRIPZIOAK

#### **32. artikulua.- Nahitaez inskribatu beharreko egintzak.**

Hauek dira nahitaez inskribatu beharreko egintzak:

- a) Fundazioaren eraketa eta fundazioaren hasierako zuzkiduraren ondoz ondoko ordainketak.
- b) Fundatzaileen atxikipena, eraketa-eskrituran ezarritako epean.
- c) Zuzkidura handitzea edo gutxitzea.



- d) Patronatuko kideen izendapena, ordezipena, etetea eta kargu-uztea.
- e) Patronatuak sortutako batzorde betearazle eta eskuordetuak, kideen izendapena eta kargu-uztea.
- f) Patronatuak egindako eskuordetze eta/edo ahalordetze orokorrak. Ez dira inskribatu behar auzietarako ahalordetzea eta ahalordetze hori kentzea.
- g) Atzerriko fundazioen ordezkariak.
- h) Euskal Autonomia Erkidegotik kanpo inskribatutako fundazioen ordezkariak eta haietan egindako aldaketak.
- i) Estatutuen aldaketak.
- j) Fundazioen bat-egiteak eta zatiketak.
- k) Fundazioak beste erakunde bat bihurtzea eta alderantziz.
- l) Fundazioak azkentzea eta likidazioa.
- m) Ebazpen judizialak eta administratiboak, legeetan aurreikusitako baldintzetan.
- n) Behin-behineko kudeaketa baimentzen duten ebazpen judizialak, hartutako ahalmenak, ezarritako epea eta, hala badagokio, epearen luzapena.
- ñ) Oro har, egindako idazpenen edukia aldatzen duten egintzak edo, legeen arabera, inskribatu behar direnak.

### **33. artikulua.- Inskriba daitezkeen tituluak.**

- 1.- Notario-eskritura publiko bidez formalizatu beharko dira aurreko artikuluko a), b), c), f), g), h), i), j) eta k) letretan aipatzen diren egintzak.
- 2.- d) eta e) letretako egintzak, berriz, notario-eskritura publiko bidez edo legitimatutako sinadurak dituen ziurtagiri bidez formalizatuko dira.
- 3.- l) eta m) letretan aipatzen diren egintzak ebazpen judizial edo administratibo baten bitartez inskribatuko dira.
- 4.- Idazpenen edukia aldatzeko egintzak, n) letran aipatzen direnak, inskribatzeko, aldatzen den egintza inskribatzeko eskatu zen agiriaren mota bereko beste agiri bat aurkeztu beharko da.

### **34. artikulua.- Erregistroko inskripzioen izaera.**

- 1.- Izaera eratzaileria izango du honako egintza hauek Fundazioen Erregistroan inskribatzeak: fundazioen eraketa, bat-egitea, zatiketa, aldatzea eta azkentzea.
- 2.- Estatutuen aldaketak izaera eratzaileria izango du, erabakia hartzen zen egunera arteko atzeraeraginez.



3.- Patronatuko kideen izendapenak eta kargu-uzteak adierazpenezko izaera izango dute, baldin eta hiru hilabeteko epean jakinarazten bazaio aldaketaren berri Erregistroari, erabakia hartzen den egunetik hasita.

4.- Epez kanpo aurkezten bada fundazioaren patronatuko kideen aldaketa inskribatzeko eskaera, erabakia ez da baliozkoa izango, harik eta Erregistroan inskribatzen den arte. Kasu horretan, gainera, indarrean dagoen patronatuak hartutako erabakiaren ziurtagiria aurkeztu beharko da eskaerarekin batera, epe barruan jakinarazi ez den patronatuaren aldaketa berresteko.

5.- Gainerako kasuetan, adierazpenezko izaera izango du erregistro-inskripzioak, eta hartu zen unetik izango da baliozkoa patronatuak hartutako erabakia. Edonola ere, erabakia Erregistroan inskribatzeko, fundazioei buruzko araudian ezarritako betekizunak bete beharko dira, Erregistroaren publikotasunaren ondorioetarako.

### **35. artikulua.- Titulua partez inskribatzea.**

1.- Inskribatu beharreko tituluan gertakari, egintza edo negozio juridikoak jaso badira – haien artean inolako loturarik ez dutenak–, eta haietako batean akatsen bat atzematen bada, akatsik gabeak inskribatu ahal izango dira, eta hala egingo da interesdunak hala eskatu ondoren.

2.- Titulua partez inskribatu ahal izango da soilik klausula nahiz estipulazio akasdunak aukerakoak badira edo horien ordezkari beharrezko lege-arauak ezartzen badira.

### **36. artikulua.- Erregistro-idazpenak.**

1.- Erregistroko liburuetan honako idazpen-mota hauek egingo dira:

- a) Inskripzioak.
- b) Prebentziozko oharpenak.
- c) Ezeztapenak.
- d) Orri-bazterreko oharrak.

2.- Erregistro-idazpenetan, honako hau jaso behar da: erregistro-idazpenak eurak egin beharra eragiten duten ebazpen administratibo edo judizialen ebazpen-zatiaren eduki nagusia.

3.- Euskal Autonomia Erkidegoko bi hizkuntza ofizialetan idatziko dira erregistro-idazpenak, aurkeztutako eskaera zer hizkuntzatan idatzi den gorabehera.

## **3. ATALA**

### **ERREGISTRO-PROZEDURA**

### **37. artikulua.- Fundazioen eraketa.**



1.- Honako hauek aurkeztu beharko dira fundazioaren eraketa inskribatzeko eskaerarekin batera: eskritura publikoa, legearen 9. artikuluan adierazten diren gutxieneko edukiak dituela, lehenengo ekitaldi ekonomikoaren jarduketa-programa eta, hasierako zuzkidura hogeita hamar mila eurotik beherakoa baldin bada, Euskal Autonomia Erkidegoko Fundazioen Legearen 12.1 artikuluan aipatzen den azterlan ekonomikoa.

2.- Erregelamendu honen 23. artikuluan ezarritako baldintzak bete beharko ditu lehen ekitaldi ekonomikoko jarduketa-programak.

### **38. artikulua.- Estatutuak aldatzea.**

1.- Patronatuak estatutuak aldatzeko hartutako eta publiko egindako erabakia aurkeztu beharko da estatutuen aldaketa inskribatzeko eskaerarekin batera.

2.- Estatutuak aldatzeko erabakiak justifikatu beharko du aldaketa komenigarria dela fundazioaren intereserako, fundazioaren helburua errespetatzen duela eta fundatzaileek ez dutela espresuki debekatu. Erabakian jaso beharko dira, halaber, aldatutako artikuluen zerrenda, aldatzen edo eransten diren artikuluen idazketa berriaren hitzez-hitzezko transkripzioa eta aldaketaren ondoriozko estatutuen testu bategina.

### **39. artikulua.- Patronatukideak izendatzea.**

1.- Fundazioaren patronatuko kideen izendapena eta ordezpena inskribatzeko eskaerarekin batera, izendapena egiaztatzen duen agiria aurkeztu beharko da, bai eta kargua espresuki onartu dela egiaztatzen duena ere.

2.- Izendapenaren inskripzioa honako era hauetara egingo da: eskritura publiko bidez, notario batek legitimatutako sinadura duen agiri pribatu bidez edo izendapenak egin diren bilkuraren aktaren ziurtagiri bidez, betiere ziurtagiria egin duen idazkariaren eta lehendakariaren sinadurekin (notario batek legitimatu beharko ditu sinadurok).

3.- Kargu publiko edo pribatuak betetzeagatik izendatutako patronatuko kideen inskripzioa ziurtagiri edo antzeko agiri bidez egingo da.

4.- Kide bakarreko patronatua, Euskal Autonomia Erkidegoko Fundazioei buruzko Legearen 14.5 artikuluan aurreikusten dena, pertsona fisiko bakarrik osatuko da.

### **40. artikulua.- Patronatukideen kargu-uztea.**

1.- Dagokion erregistroak emandako ziurtagiri bidez egingo da patronatukideen kargu-uztearen inskripzioa, baldin eta heriotzak, heriotza-deklarazioak edo nortasun juridikoa iraungitzeak eragindakoa bada.

2.- Kargu-uztea edo etetea epailearen ebazpen irmoz erabakitzen bada, delako ebazpenaren lekukotza bidez egingo da inskripzioa.

3.- Uko egitearen ondoriozko kargu-uztearen inskripzioa era hauetako batean egingo da: eskritura publiko bidez, notario batek legitimatutako sinadura duen agiri pribatu bidez edo Euskal Autonomia Erkidegoko Fundazioen Erregistrora bertaratuta; azken



kasu horretan, fundazioaren patronatuko kide izateari uko egiteko jakinarazpenaren ziurtagiria aurkeztu beharko da. Behin inskribatuta, Fundazioen Erregistroak fundazioari jakinaraziko dio uko-egitearen inskripzioa baimentzen duen administrazio-ebazpena.

4.- Kargu publikoa betetzeagatik izendatutako patronatuko kideen kargu-uztearen inskripzioa organo eskudunak egindako ziurtagiriaren edo antzeko agiriaren bidez egingo da.

5.- Kargua uzteko ahalmena beste pertsona fisiko edo juridiko bati badagokio, ziurtagiri edo antzeko agiri bidez egingo da kargu-uztearen inskripzioa, notarioak legeztatutako sinadurekin.

#### **41. artikulua.- Ahalordetzea, ahalmenak eskuordetzea, batzorde eskuordetuak edo betearazleak eratzea eta haiek errebokatzea.**

Honako agiri hauek aurkeztu beharko dira, eta eskritura publikoan jaso, egintza hauek inskribatzeko eskaerarekin batera: ahalordetzeak, patronatuak ahalmenak eskuordetzea bere kideei, batzorde eskuordetuak edo betearazleak sortzea, batzorde betearazle edo eskuordetu horietako kideen hasierako izendapena edo aldaketa, batzordeotan egindako aldaketak eta errebokatzeak:

- a) Fundazioen patronatuak ahalordeak emateko edo errebokatzeko hartutako erabakia, non identifikatuko baita zeini eman edo errebokatu zaion ahalordea.
- b) Patronatuak emandako ahalmenak. Kasu honetan, ahalmenak emateko muga bete beharko da, Euskal Autonomia Erkidegoko Fundazioei buruzko Legearen 18. artikuluan aurreikusitakoari jarraituz.
- c) Ahalordea jaso duten pertsonen onarpena, Euskal Autonomia Erkidegoko Fundazioei buruzko Legearen 16. artikuluan ezarritako moduetako batean egina.

#### **42. artikulua.- Atzerriko fundazioen ordezkariak.**

1.- Atzerriko fundazioak Euskal Autonomia Erkidegoko Fundazioen Erregistroan estreinakoz inskribatzeko eskaerarekin batera, behar bezala legeztatutako edo zigilatutako agiriak aurkeztu beharko dira, honako hauek egiaztatuko dituztenak: fundazioa izan badela, hark indarrean dituen estatutuak, gobernu-organotako titularren identitatea eta ordezkariak ezartzen duen agiria.

2.- Babeslaritzak txosten bat eman beharko du, estutuak indarrean dagoen araudira egokitzen direla egiaztatzeko.

3.- Ordezkaritzaren inskripzioan jasoko dira, orobat, fundazioaren ordezkariaren izena, helbidea, izendatutako ordezkarien identitatea eta ahalmenak.

#### **43. artikulua.- Beste fundazio-erregistro batzuetan inskribatutako fundazioen ordezkariak.**

Honako agiri hauek aurkeztu beharko dira beste erregistro batzuetan inskribatutako fundazioen ordezkariak inskribatzeko eskaerarekin batera:



- a) Patronatuak ordezkariak sortzeko hartutako erabakia, non jasoko baitira helbidea, ahalordea jaso duten pertsonen identitatea eta haiei emandako ahalmenak.
- b) Jatorrizko erregistroak emandako ziurtagiria, non egiaztatuko baita fundazioaren eraketa benetan inskribatuta dagoela eta fundazioak Euskal Autonomia Erkidegoko ordezkariak pertsonen emandako ahalordea.
- c) Eskritura publikoa, indarrean dauden estatutuak bilduko dituenak.

#### **44. artikulua.- Fundazioak azkentzea.**

1.- Fundazioa azkentzen baldin bada eratzean ezarritako epea bukatzeagatik, azken inskripzioaren ondoan orri-bazterreko ohar bat egingo da, ofizioz edo edozein interesdunaren eskariz, fundazioa desegin dela adieraziz.

2.- Patronatuak hartu baldin badu fundazioa azkentzeko erabakia Euskal Autonomia Erkidegoko Fundazioei buruzko Legearen 40. artikuluko b), c), d) eta e) apartatueta ezarritako arazoietako bat dela medio, patronatuak hartutako erabakia aurkeztu beharko da azkentzeko eskaerarekin batera, eta hartan, azkentzeko arazoia azalduko da eta honako hauek jasoko: azkentzeko erabakia hartu zen egunean egindako fundazioaren balantzea, likidazio-faserako jarduketako programa, gerakinaren destinoa eta, hala badagokio, batzorde likidatzailearen izendapena. Eskritura publiko batean jaso behar dira agiri horiek.

Kasu honetan, azkentzea inskribatzeko, Babeslaritzak alde aurretik berretsi beharko du.

3.- Epailen batek erabakitako azkentzea baldin bada, hura deklaratu duen ebazpen judizialaren lekukotzaren bidez inskribatuko da.

#### **45. artikulua.- Fundazioak likidatzea.**

Honako agiri hauek aurkeztu beharko dira, likidazioa inskribatzeko eskaerarekin batera (agiriok publiko egin beharko dira, gainera):

- a) Batzorde likidatzailearen erabakia, non onartuko baitira likidazio-eragiketak eta erabakiaren egunean egindako likidazio-balantzea.
- b) Likidazio-eragiketak formalizatzeko erabilitako agirien kopia, eta fundazioa likidatzearen ondoriozko gerakinaren destinoa justifikatzeko agiriak.

#### **46. artikulua.- Fundazioek bat-egitea.**

1.- Bat-egite baten inskripzioa egiteko –izan fundazio berri bat sortu delako edo fundazio batek beste bat xurgatu duelako–, aurretik, eragiketan parte hartzen duten fundazioek bat egiteko erabakiak hartu behar dituzte, zeinak publiko egingo baitira eskritura publiko bakar baten bidez.

2.- Bat egiteko eskaerarekin batera, eskritura publikoa aurkeztu behar da, bat egiteko erabakiak jasoko dituenak –zer arazoik eragin duten bat-egitea zehaztuta– eta ezarriko duena zein diren bat-egitearen ondoriozko patronatua eta bat-egitearen proiektua, zeinak ezinbestez barne hartuko baititu bat egiteko eragiketaren egitura juridikoa, bat-





egitearen balantzea, bat-egitea erabaki den unean egina, eta bat-egiteak helburuetan, jardueretan eta ondarean duen eraginari buruzko azalpen-memoria bat.

3.- Bat-egitearen ondorioz fundazio berri bat sortzen bada, eskritura publikoak, adierazitakoez gainera, Euskal Autonomia Erkidegoko Fundazioei buruzko Legearen 9. artikuluan ezarritako betekizunak jaso beharko ditu. Bat-egitea xurgatzearen ondorioz gertatzen bada, fundazio xurgatzailearen estatutuetan izandako aldaketak jasoko dira erabakian, halakorik badago.

4.- Fundazio berri bat osatzeko bat egiten duten fundazioak edo xurgatuak direnak azkendu egingo dira, likidazioan sartu gabe. Fundazioaren ondare osoa fundazio berriari edo xurgatzaileari eskualdatuko zaio, eta honek bere gain hartuko ditu azkendutakoen eskubide eta betebeharrak.

5.- Bat egiteko erabakiak Babeslaritzaren onarpena izan behar du. 8.- Bat-egiteari buruzko inskripzioak egin ondoren, azkendutako fundazioen idazpenak ezeztatu egingo dira ofizioz.

#### **47. artikulua.- Fundazioak zatitzea.**

1.- Fundazioak zatitu ahal izango dira, bitan edo gehiagotan, eta, hartara, fundazio berri bat edo batzuk sortuko dira, eta zatitua edo jatorrizkoa mantenduko da, betiere Euskal Autonomia Erkidegoko Fundazioei buruzko Legearen 39.1 artikuluan ezarritako oinarrizko betekizunei jarraituz.

2.- Zatiketak inskribatzeko eskaerarekin batera, eskritura publikoa aurkeztu behar da, honako hauek bilduko dituena:

- a) Zatitzeko erabakia, fundazio zatituaren edo jatorrizkoaren patronatuak hartua.
- b) Zatitutako fundazioaren balantzea, zatitzeko erabakia hartu zen egunean egina.
- c) Azalpen-memoria bat, informazio hau bilduko duena: zatiketaren ondorioz sortzen diren fundazioei edo bat egindako fundazioei eskualdatzen zaien jatorrizko fundazioaren zatiaren ondare-goerari eta jarduerari buruzko informazioa.

3.- Zatiketaren ondorioz fundazio bat edo batzuk eratzen baldin badira, legedian fundazioen eraketari buruz ezarritako araudia aplikatuko da, bai eta erregelamendu honetan ezarritakoa eta estatutuen aldaketari buruzko araudia ere.

4.- Lehendik dauden beste fundazio batekin edo batzuekin bat egiteko egiten bada zatiketa, legedian bat-egiteei buruz bildutako xedapenak eta erregelamendu honetakoak aplikatuko dira.

5.- Bi kasu horietan, zatiketa egiteko, Babeslaritzak baimena eman beharko du aldez aurretik, eta fundazio berri bat edo batzuk sortzeko zatiketaren aurka agertu ahal izango da, hiru hilabeteko epean, zatiketa egiteko erabakia jakinarazten denetik. Halaber, eskaera bat aurkeztu beharko da zatitzeko erabakia Erregistroan inskriba dadin.

#### **48. artikulua.- Fundazioak eraldatzea.**



1.- Fundazioak beste pertsona juridiko bat bihur daitezke, Euskal Autonomia Erkidegoko Fundazioei buruzko Legearen 44. artikuluan ezarritako betekizunei jarraituz.

2.- Eraldaketa inskribatzeko eskaerarekin batera, fundazioaren patronatuak hartutako erabakia aurkeztu beharko da. Eskritura publikoan jaso beharko da erabakia, eta honako hauek bildu behar ditu:

a) Fundazioa zer pertsona juridiko bihurtzen den, haren izena eta Euskal Autonomia Erkidegoko irabazi-asmorik gabeko erakunde bat dela.

b) Fundazioa eraldatuta sortzen den erakundeak zer helburu dituen; fundazioak ordura arte zituenak bildu behar ditu, gutxienez.

c) Zer organo publikok izango duen fundazioa eraldatuta sortzen den erakundearen kontrola.

d) Fundazioaren balantzea, eraldatze-erabakia hartzen den egunean onartua.

e) Azalpen-memoria bat, jasoko duena zein diren fundazioaren ondare-egoera eta jarduerak, hura eraldatuta sortzen den erakundeari eskualdatuko zaizkionak.

f) Balantzea egin ondoren, zein den eraldatutako fundazioaren gerakina, sortzen den erakundearen hasierako ondare garbia osatuko duena.

3.- Euskal Autonomia Erkidegoko Fundazioen Babeslaritzak onartu behar du eraldatze-erabakia.

4.- Hala badagokio eraldatutako fundazioa erregistro eskudunean inskribatu ondoren, fundazioak inskripzio horren berri eman beharko dio Euskal Autonomia Erkidegoko Fundazioen Erregistroari, fundazioaren erregistro-orria ofizioz ezezta dezan. Eraldatutako erakundea inskribatzeko eskumena duen erregistroak erabakitzen badu erakundeak ez dituela betetzen inskripzioa egiteko araudian bildutako baldintzak, inskripzioa ukatzeko agindua bidali beharko dio Euskal Autonomia Erkidegoko Fundazioen Erregistroari. Euskal Autonomia Erkidegoko Fundazioen Babeslaritzak berretsi beharko du agindu hori, eta Erregistroan inskribatu beharko da.

#### **49. artikulua.- Fundazio-izaera ez duten pertsona juridikoak fundazio bihurtzea.**

1.- Pertsona juridiko bat fundazio bihurtzeko inskripzio-eskaerarekin batera, eraldatzeko erabakia aurkeztu beharko da. Organo eskudun batek hartu beharko du erabaki hori, kontuan hartuta nolako erakunde edo pertsona juridikoa den, eta publiko egin beharko da. Honako hauek jasoko ditu erabakiak:

a) Fundazio-izaera ez duen baina fundazio bihurtzen den pertsona juridikoa zer erregistroan dagoen inskribatuta, zer izen duen eta gainerako erregistro-datuak.

b) Administrazio-egintza, zeinaren bidez erabakitzen baita fundazio bihurtzen den erakundeari baja ematea, Euskal Autonomia Erkidegoko Fundazioen Erregistroan inskriba dadin.

c) Fundazioak eratzeko nahitaezkoak diren agiriak, Euskal Autonomia Erkidegoko



Fundazioei buruzko ekainaren 2ko 9/2016 Legearen 9. eta 10. artikuluetan ezarritakoak.

d) Eraldatutako erakundearen helburuak. Antzekoak izan behar dute fundazio berriak estatutuetan bilduta dituen helburuen aldean. (eraldatze-eskritura publikoan jasoko dira estatutuak).

e) Interes orokorreko zer arrazoi dagoen fundazio-izaera ez duen pertsona juridikoa fundazio bihurtzeko. Halaber, adieraziko da eraldatutako erakundearen fundatzaileek ez dutela berariazko debekurik ezarri.

f) Eraldatutako erakundearen balantzea, aurreko ekitaldiaren amaieran itxia.

g) Azalpen-memoria, non jasoko baita eraldatutako erakundeak fundazioari eskualdatuko dizkion ondarearen eta jardueren egoerari buruzko informazioa.

h) Eraldatutako erakundearen gerakina, balantzea egin ondorengoa. fundazioaren hasierako zuzkidurara bideratuko dena.

2.- Eskritura publikoan jaso beharko dira bai eraldatze-erabakia, bai dagokion araudian eta erregelamendu honetan aurreikusitako nahitaezko agiriak, eta Euskal Autonomia Erkidegoko Fundazioen Erregistrora bidaliko zaizkio, agindu bidez inskriba daitezten, fundazioak eratzeko aurreikusitako baldintza guztiak bete ondoren, betiere. Aurretik, nolahi ere, Babeslaritzaren oniritzia beharko da, bai eta Babeslaritzaren Aholku Batzordearen txostena ere.

3.- Euskal Autonomia Erkidegoko Fundazioen Erregistroak eta Babeslaritzak erabakitzen baldin badute erakundeak ez dituela betetzen fundazio bihurtutako erakundeak inskribatzeko baldintzak, beren araudian eta fundazioei buruzkoan ezarritakoak, inskripzioa ukatzeko agindua emango da, eskaera zuzentzeko errekerimenduak egin ondoren, betiere. Errekurtsoak aurkezteko epea amaitu ondoren, agindu hori dagokion erregistrora bidaliko da, espediente osoarekin batera, eta erakunde bat eraldatuta fundazio bat eratzeko espedientea artxibatuko da.

#### **50. artikulua.- Euskal sektore publikoko fundazioak.**

1.- Euskal Autonomia Erkidegoko Fundazioei buruzko Legearen lehen xedapen iragankorrean ezarritako estatutu-egokitzapena dela eta, aipatutako legearen 63.1 artikulua arabera euskal sektore publikoak diren fundazioek berariaz aipatu beharko dute lege horren 10. artikuluko f) letrari buruzko erreferentzia bat, estatutu-egokitzapen horretan.

2.- Halaber, sektore publikokoak diren ala ez adierazi beharko dute, 29. artikuluan arautzen den erregistro-datuei buruzko ziurtagirian, eta, fundazioa sektore publikokoa baldin bada, egiaztatu beharko du benetan bat datozela sektore publikoak egindako ondare-ekarpena eta fundazioaren patronatuko kide-kopurua.

### **4. ATALA**

#### **ERREGISTROAREN BESTE ZENBAIT EGINKIZUN.**



## **51. artikulua.- Izenari buruzko ziurtagiria.**

1.- Fundatzaileek izenari buruzko ziurtagiria eskatu beharko diote Euskal Autonomia Erkidegoko Fundazioen Erregistroari, hain zuzen ere egiazta dezan izenak betetzen duela Euskal Autonomia Erkidegoko Fundazioei buruzko Legean eta erregelamendu honetan ezarritakoa. Hartara, eratze-eskritura publikoan jaso ahal izango da; horretarako, urtebeteko epea izango da, ziurtagiria jasotzen denetik hasita. Epe hori igaro ondoren, ziurtagiriak indarra galduko du.

2.- Ezin da lehendik dagoen fundazio baten izen berdina jarri. Alde horretatik, kasu hauetan ulertuko da bi izen berdinak direla:

a) Hitz berak ordena, genero eta numero desberdinekin erabiltzen direnean.

b) Hitz berak erabiltzen direnean, honako hauek gehituta edo kenduta: hitz edo esamolde orokor edo osagarri, artikulua, adberbio, preposizio, juntagailu, azentu, marratxo, puntuazio-zeinu edo antzeko osagaiak; edo hitz berak erabiltzen direnean, hizkuntza ofizial desberdinetan.

c) Adierazpen fonetikoa berdina denean. Hala gertatzen da proposatutako izenak lehendik zegoen beste izen batekin nahasteko bide ematen duenean.

3.- Izenari buruzko ziurtagiri-eskaeran, hiru izen adieraz daitezke, lehentasun-hurrenkeraren arabera.

4.- 10 egun balioduneko epea du Fundazioen Erregistroak izenari buruzko ziurtagiria emateko. Izen bat baino gehiago proposatzen baldin bada, eskabidean agertzen den lehentasun-hurrenkeraren arabera erabakiko dira, eta ziurtagiria jasotzen duen lehendabizikoa gordeko da.

5.- Beste fundazio bat xurgatzen denean edo fundazio berri bat sortzen denean, onartuko da xurgatutako edo azkendutako fundazioarekin bat datorren izena.

## **52. artikulua.- Liburuak legeztatzea.**

1.- Akta-liburua, eguneko liburua eta urteko inbentarioa eta kontuen liburua aurkeztu beharko dira, Euskal Autonomia Erkidegoko Fundazioen Erregistroan, legeztatu ditzaten, ekitaldi bakoitzeko lehen seihilekoan, eta, horretarako, Euskal Autonomia Erkidegoko Administrazioaren egoitza elektronikoa erabiliko da. Legeztatze-eskaera epez kanpo aurkeztuz gero, hala jasoko da dagokion liburuaren eginbidean eta idazpenean.

2.- Legeztatu nahi diren liburuarekin batera, legeztatze-eskaera aurkeztuko da, liburu horien zerrenda duela, bai eta honako hauek ere: zenbat orri daukan liburu bakoitzak, eta noiz ireki ziren eta, hala badagokio, noiz itxi ziren legeztatutako azken liburuak.

3.- Eraketa-eskritura publikoaren inskripzio-eskaera aurkeztu ondoren baino ezingo dute eskatu fundazioek liburuak legeztatzeko. Liburuak ez dira legeztatuko, harik eta inskripzio hori egin arte.

4.- Manipulatzea eragozten duen euskarri batean aurkeztu beharko dira legeztatu



beharreko liburuak.

### **53. artikulua.- Liburuak legeztatze prozedura.**

1.- Legeztatze-eskaera elektronikoki sinatu beharko du horretarako beharrezkoa den ahalmena duen pertsonak.

2.- Modu automatikoan gauzatuko da legeztatzea, zigilu elektroniko bidez. Dagozkion oharra egingo dira, eta fundazioari itzuliko zaio legeztatutako liburua, euskarri elektronikoan.

3.- Euskal Autonomia Erkidegoko Fundazioen Erregistroak bermatu behar du izaera pertsonaleko datuen babesari buruzko legedia betetzen dela. Horretarako, fundazioek aurkeztutako liburuak legeztatu ondoren, haien esku geratuko dira, eta ez da kopiarik gordeko Erregistroan.

### **54. artikulua.- Erregistroaren publikotasuna.**

1.- Erregistroa publikoa da haren edukia ezagutu nahi duten pertsona edo erakunde guztientzat, eta honako hauen bidez gauzatuko da publikotasuna: idazpenen edukiri buruzko ziurtagiriak, informazio-ohar soilak, egindako inskripzioekin lotura zuzena duten idazpen edo agirien kopia eta zerrendak.

2.- Interesdunak, zerrendak eskatzeko, bilaketa-irizpideak zehaztu beharko ditu, eta ez dira onartuko eskaera generikoak edo Erregistroko datu guztiak iraultzeko asmoz egindakoak. Fundazioen izena, inskripzio-zenbakia eta egoitza soziala jasoko dira zerrendetan.

3.- Publikotasuna gauzatzeko, halaber, idazpenak eta agiriak erakusgai jarri ahal izango dira. Horretarako, interesdunek Erregistroaren egoitzan agertu beharko dute, eta langile eskudunen aurrean erakutsiko dira agiriok.

4.- Erregistroak zainduko du izaera pertsonaleko datuen babesari buruzko araudia betetzen dela, baldin eta eskaerek eragiten badiete idazpen edo agirietan bildutako datu pertsonalei eta espedienteetako ebazpen judizialeetan bildutakoei.

### **55. artikulua.- Kontsultak.**

Eusko Jaurlaritzaren web-orriak mekanismo bat eskainiko du fundazioen araudiari buruz kontsultak egiteko, eta hori izango da bitarteko nagusia halako kontsultak egiteko. Kontsulta horiei emandako erantzunak argibideak emateko izango dira, kontsultetan azaldutako kasuetan aplikatu ahal izango dira, eta oinarri izango dute kontsulta egin duen pertsonak edo erakundeak emandako informazioa. Ezin izango dira erabili, ordea, interpretazioak egiteko irizpide orokor gisa.

**ERANSKINA**

**JARDUERA-KODEAK**



- 1.- Osasuna.
- 2.- Hezkuntza.
- 3.- Kultura.
- 4.- Euskararen sustapena. Hizkuntza-aniztasuna eta euskal kultura.
- 5.- Kirolaren sustapena.
- 6.- Lan-arloa.
- 7.- Giza-eskubideen eta printzipio etiko eta demokratikoen defentsa.
- 8.- Gizarte-zerbitzuak. Gizarte-ekintzaren sustapena.
- 9.- Garapenerako lankidetzak. Laguntza humanitarioa.
- 10.- Ingurumenaren eta ondarearen defentsa.
- 11.- Etxebizitza babestea.
- 12.- Segurtasuna.
- 13.- Gizarte-ekonomiaren eta/edo enpresa-ekintzaitzaren sustapena.
- 14.- Lehen sektorearen eta industria- eta zerbitzu-sektorearen garapena.
- 15.- Informazio-gizartearen garapena.
- 16.- Ikerketa zientifikoa eta garapen teknologikoa.
- 17.- Aukera-berdintasunaren sustapena.
- 18.- Komunitate-garapena.
- 19.- Animalien defentsa eta babesa.
- 20.- Boluntariotzaren sustapena eta tolerantziaren defentsa.
- 21.- Bestelakoak.